

4

核心

「M̄-thang 想講我來 ê 目的是 beh 廢除摩西 ê 律法 á 是先知 ê 教示。
我來 m̄ 是 beh 廢除，是 beh 成全。」
(《全民台語聖經》馬太福音 5：17)

你認為啥物是你存在 ê 核心？啥物是你起造你生活 ê 基礎？

基督講祂來是 beh 實現摩西 ê 律法 kah 先知 ê 話，m̄ 是 beh kā in 改變。耶穌所講 ê 山上寶訓—八福，m̄-nā 搖動群眾，mā 深深擾亂祂家己 ê 門徒。M̄-koh，祂堅持講：「我 m̄ 是一個新 ê 摩西。」祂無 tùi 西奈山帶一個新 ê 誠命落來。身為上帝應允 ê 救世主，祂 tī 世上 ê 生活是 beh 實現古早 ê 經文；beh 解說 hiah-ê 經文 ê 意義 kah 闡明上帝 ê 本質。

聖經是 bē 改變 ê，mā 是永遠有效 ê，tòh kah 使徒保羅所認同 ê 全款。Tī 保羅遙遠 ê 宣教旅程中，伊 tiān-tiān 想 beh 說服人民，講伊 ê 信息 kah 希伯來經文是完全一致 ê。時代趨勢 kah 人類 ê 習慣有可能來來去去，m̄-koh，上帝 ê 話永遠是信實 ê。直到上帝國度完全臨到，經文 lóng bē 改變 á 是 hông bē 記得；經文是永遠存在 ê。Tī 咱 teh chhiau-chhōe 咱生活 ê 核心意義 ê 時，這是 gōa-nih-á 重要！

咱無 ài hit-ê 核心時常改變，卻是

ài 它維持穩定，是 ē-tàng 預測 kah 安全可靠 ê。咱 ài 咱 ê 存在有一個 bē 搖動 ê 基礎；tī chia，基督 kā 咱講，咱有一個堅實 ê 基礎—聖經—thang 起造咱 ê 生活。無啥物 ē-tàng kā 它毀滅；戰爭 bē-tàng kā 它改變，喪失咱所疼 ê 人 bē-tàng kā 它毀壞，seng-lí 失敗 bē-tàng kā 它拆除，破產 bē-tàng kā 它擦消，甚至死亡 mā bē-tàng kā 它毀滅。

若是咱 ài 有一個堅實 ê 核心，一個堅固 ê 基礎來起造咱 ê 生活，án-ne，咱必須選擇上帝 ê 話。當其它 tàk 項物件 lóng ka-láuh tī 土腳 ê 時，chit-ê 核心 iáu 會繼續 khiā 在。

祈禱：上主 ah，當時間 ê 變化 kah 環境 ê 變動威脅 beh 改變我 ê 時，求祢幫助我會記得祢有賜阮祢神聖 ê 話語，成做一個船碇 kah 一個 bē 改變 ê 生活基礎。求祢 hō 我有智慧來走 chhōe 它 ê 深度，koh 有行動 ê 勇氣；tú 照耶穌 kah 保羅 ê 模樣。我奉耶穌 ê 名祈禱。阿們。

(1993.02.14)